



22255

III

Mag. St. Dr.

P

*rex poloniae**Wicki*


*Winkler Martini: Panegyricus Serenissimo  
Principi Michaeli, Regei Poloniae, - sacro  
solennique regalis inaugurationis die - consecratus.*

PANEG. et VITAE

Polon. Fol.

Nr. 1645.







# PANEGYRICVS

SERENISSIMO PRINCIPI

## MICHAELI

DEI GRATIA

## REGI POLONIÆ

Magno Duci Lithuaniae, Russiae, Prussiae,  
Masouiae, Samogitiae, Liuaniae, Smo-  
lensciae, Czernihouiaeq; &c. &c.

*In primo aditu Maiestatis*

Sacro solenniq; Regalis inaugurationis die


A

M. MARTINO WINKLER, *Scholastico SAN-  
CTÆ ANNÆ, Collega Maiore, Tyliciano Eloquentiæ*  
P R O F E S S O R E.

Publicæ lætitiæ & officiosi cultus gratiâ

## CONSECRATVS

*Anno Regis Regum nati MDCLXIX. Die 30. Septem:*



## C R A C O V I Æ,

Typis NOVODVORSCIANIS.





22255 III

Nullum præstabilius aut pulchrius DE I munus  
est, quam castus, & sanctus, Divisq; simillimus  
P R I N C E P S.

*Plin: Paneg: Traian;*

SERE.





# SERENISSIME R E X



Vgustam Regni felicitatem, & beatissimi sæculi ortum, maiori successu quàm destinatione, terris illabentem nostris, est vnde Tibi Autori suo, cui similem nec voto saltem concipere succurrebat: vnde Reginae Libertati, inter discrimina summa, iniuriasque eluctatae: vnde nobis omnibus, Patriæque multâ strage deformi, cum curâ & studio gratulemur. Quamquam nulla satis cura absolvere potest, humanæ intentatû opus industriæ, nulla meditata oratio exprimere, magnam vim post diuturnam ægritudinem surgentium gaudiorum: quæ nec metas inueniunt, quibus circumscribi possint, nec captus hominum, quibus concipi, adeoque fit, vt quod à nemine capi potest, capiat comprehendatque omnes. Repræsentas enim lætissimâ hâc præsentium rerû scenâ, exprimisque immensitatem DEI, ô REX: cum quo æquatam potestatem, & diuisû in Orbe Polono habes imperium. Ille Te sibi causamq; nostram, clarissimis iudicij sui signis, asseruit approbavitque. Ille actas in diuersum mentes, & stre-



pentia magno ambitu studia, quietissimo concordiæ silentio consopiuuit. Ille imposuit, tot annis, quibus improbas patium molitiones, aut terruimus, aut timuimus, sollicitæ curæ magnum diem; vt deinde imperij nostri nostro arbitrio potentes, neminem ambientium, nec metuere nec amare cogamur. Iuuat iam patrio more, patriâ virtute lætari, & præteriti temporis in comparisonem, futurique in exemplum, grande hoc ac duraturum procudere monumentum; esse DEO curæ res Polonas, voluisseque, vt ingentia mala & pati, & facere assuetis, ferò atque pedetentim ingentia bona venirent, nec sine periculo stare possemus, ni prius in ipsa pericula propelleremur. Nam in vacua nuper, orbâque Rege Republicâ, quot in curas suspicionesque dispersitos animos habuimus? cum omnia, pariter ægra ac valida, composita ac coercita intumuissent; cum nec spes nec metus cuiquam certus, sed vtrâque immodica essent; vt anxij trepidique nobis constitimus? vt paratâ magnis ausis materie, laborauimus? Senescentibus prope ipsis nobiscum aduersis, fortunâque Regni vetere, cum meritis nos deferente, quotusquisque emensus longû calamitosæ ætatis curriculû, quò amicam sibi eam faceret conciliaretque, iuuentutem & exactos olim tranquillitatis annos, non flagrantissime cupere? Interim incertissimis fidere, libertatis vitijs moueri non curâ, optare quæ consequi posse spes non fuit, tantum communi rei, quantum ipse sibi metuere, cuicunque repræsentati commodi authoramento addictus, se animumque fatigare, diuersâ demùm alternanteque aurâ inflatus ac impulsus, pro rationæ fortunæ & tempestatum, velifica-



ficationem mutare, & subsidere, palpitareque. Omnes tandem precari, tollereque in cælum manus, daret exoratum terris supremum Numen, eum nobis Principem, quem liqueret diuinitus constitutum, Parentem publicum, iusti & æqui amantem, spiritum velut Reipublicæ, per omnes corporis partes, minimas, maximas, æquè diffusum, caloris vigorisque datorem munificum, noscentem Ciues suos, & item Ciuibus suis cognitum, amabilis Serenitatis augustum restauratorem. Itura è vot o ad Superos, redituraque prosperè talia omnium vota, non tam facilè erat credere, quàm nunc mirari, Te ad votum omnium accessisse affectibus nostris, duxisse velut in triumphum volentem Libertatem, Europæ expectationem & iudicia confudisse; atque adeò cum vsitatum alijs sit, Maiestatem quærere & Regna, Te à Regno vltro quæsitum esse & Maiestate. Non hominis istud ingenium est, non hominis potestas: Diuina omnino munera, imò Tua à DEO sunt, quæ quoniam imputari Tibi, quod ambitiosum, renuis, agnosci ea in Te, quod heroicum, & non tam prædicare nobis, quàm audire Tibi necesse est. Sed quid dissimilem? imò quid magis solenne ac necessarium nobis? quam ea prædicare, quæ Orbem scire expediat: non aliter apud nos DEVM à Partibus MICHAELIS Regis stetisse, quàm olim cum in cælo dimicatum esset, MICHAEL steterat à partibus DEI. Hæc sæculis nota esse, Patriæ etiam ac Libertatis interest, hæc parentes liberis ac nepotibus narrare, si vnquam alias, in Te vno, Principatum ac Libertatem, pridem inter se auersa & suspiciosa nomina, sociabili nexu coaluisse; sic flagitantibus, iusti-

B

tià,



tiâ, voce communi famâ Gentis, & vtilitate communi. Vide, REX, quantam ingenij curam! quàm ingens tormentum admoueris! quantum imbecillitati nostræ negotium accersueris! quomodo magnitudine rei, quam narramus, vniuersorum vota mortalium, ingenia, Eloquentiam superaueris! & si vniuersorum, quanto magis mea vnus præconia superasti? Quidquid ideò hîc de Te dixerò, nil mirum erit, si diuina mortalis ad plenum attingere non possum, & vmbra-tilis artifex dicendi, inconniuâ acie versari in luce Serenissimi argumenti? Non pigebit tamen vel inconditâ ac rudi voce, memoriam ac testimonium præsentium bonorum, hoc est, Tuam Tibi imaginem consecrasse; quandoquidem pompa artis & ornatus, quibus mediocria tantum extolluntur, imparia & superuacua sunt, donec supra veterum inuenta, noua dicendi ingenia fingantur, quibus res nouæ ac Tuæ, quibus miracula earum ac prodigia, pari Eloquentiâ & Fide, commendentur. Mihi interim, non aliud, præter deuotam Regi meo mentem & styllum, in primo Regni limine attulisse, paratior erit seu laus, seu venia.

Equidem ego ita censeo, o REX, hoc Tuo Regno, quo vix quidquam in fortunæ operibus, editum apud nos, hac tempestate maius, etsi Polonæ Genti idem præstiteris, quod gemma auro inclusa solet, quæ mutuum illi decus dat, & ab eo accipit, merito tamen dubium adhuc inter mortales esse, ad quem plenum absolutumq; ex se bonum istud pertineat, cuius felicitas, vtriusq; è cælo data, maiore sui parte prior potiorq; sit. Nam & Tu, non ex Te solum, virtute & merito Magnus  
& Au-



& Augustus, dignum diademate verticem, sceptro-  
que manum affers; sed Maiorum etiam Diuo è lan-  
guine, non imparatus primusue, recentem hanc  
lucem aspicias, dudum in Regnatricis Domus Tuæ  
atrio appensas Coronas, diademata, Tiaras, trium-  
phantium paludamenta, Purpuras, Sceptraq; &  
obedientium populorum sacras suâ antiquitate ima-  
gines, recensere assuetus: vt sanè ipsis à fascijs ad  
Fasces, natus educatusq; videre. Et Polono  
Populo non nouum est, non solum à Patricijs re-  
gnari, natamq; domi virtutem, magno fortunarum,  
victoriarum, Gloriæq; prouentu, prout res factaq;  
docuere, in suo Throno collocatam, de genu ve-  
nerari; sed ex se quoq; Reges exteris dare, tùm  
longinquitate secretas, ac penè incognitas gentes,  
tùm viciniore nobisq; conterminas, Regno com-  
plecti; sæpius victis, non rarò volentibus, impera-  
re. Quippè post iacta stabilitaq; à Lecho Paren-  
te ac Præsidente nascentis tunc primùm Regni fun-  
damenta, postquam auctis explicatisq; latè in con-  
tinente viribus, quidquid obuium, contumax, &  
resistere ausum, freno imperij compescuimus; non-  
ne, vt omne cælum ac mare, ita littora ac portus  
nobis patuere? Si omnis intra Baltin, intra Fen-  
nicos ac Codanos sinus, intra Cimbricam Cherso-  
nesum, intra Scandinauiam atq; Finlandiæ scopu-  
los, sedibus suis populus exeat, nonne iura olim le-  
gesq; sibi dantem, Aquilam Sarmaticam, confiten-  
tibus licet magis, quàm volentibus animis, agno-  
scet? Et sanè, nisi rude illud literarum, agendisq;  
feliciter, quàm scribendis Historijs intentum sæcu-  
lum, duo propè sæcula è fastis nostris erasisset; plu-  
res haud dubiè Visimiros nostros, Danico Balticouè



æquori imperitâtes, hodie memorassemus legisse-  
musq; Moschouiâ certè, nondû in obliuionem eius  
rei euntibus annis hominibusq; licet in ipso frigo-  
re, in vltimo secretoq; Septemerione agat, primum  
armis, tum deinde plena Vladislao facta deditio-  
ne, nostrum donum habuimus: Factumque erat,  
vt hucusq; habuissemus, si Gens, quanquam seruitu-  
ti nata, & ad omne Libertatis vestigium ferox, am-  
plius tamen vitia nostra, quam imperia ferre potu-  
isset, nec nos plusquam victores, illi minus, quàm  
pro victis, sese agnoscerent; nec, quæ vetus que-  
rela est, in exitium nostrum, lætitia, luxus, secun-  
dæ res nostræ, ex iisque nunquam non in nobis  
natus hostium contemptus, & securitas, consensis-  
sent. Iam Pannonos Hunnique, & quidquid gen-  
tium Sauum, Drauam, Tibiscum uè bibit, quoties  
vltro Reges sibi à nobis poposcere? quoties impe-  
rium nostrum fuere? Porro inclytam suo olim  
Fasce sceptroque Bohemiam, nostræ etiam Liber-  
tatis claritudine, captam, non semel nobis inuita-  
tis atque accersitis paruisse, ne longius referam,  
recenseamque velut communia nostra decora, re-  
ctè mones, o REX! Tuum enim istud proprium  
decus est, auitum Tibi & debitum, quod primus  
à GEDIMINO Auo, OLGERDOQ; Pa-  
tre, Gentis KORIBVTEÆ Princeps, in Domum  
Tuam Familiamq; intulit: Illud ex alto ordina-  
tibus fatis, vt germanis Fratribus, IAGELLO-  
NE Poloniæ, KORYBUTO Bohemiæ, sceptrâ  
capeffentibus, illo iam in suis Nepotibus vltimùm  
moriente defluenteq;, hic renascens in Te rediui-  
uusq;, Fraternali sceptri Polonici successionem,  
per dominatricis Libertatis manus, melioribus au-  
spi-



spicijs, Tibi traderet consignaretq;. Quantum o!  
gloriæ pondus hoc! quanta belli pacisq; decorum!  
quanta oliuarum palmarumq; Te circumstat mes-  
sis! Dubitaueram ego, Tuanè hæc fælicitas, no-  
strane maior esset? at cum primis Augustæ Do-  
mus Tuæ liminibus venerabundum stupentemq;  
gressum infero; nostram felicitatem, quibus frui  
iudiciorum nostrorum fructu, collectâq; in vnum  
acie, priscos Maiestatis Polonæ vultus, in Te con-  
tueri liceat: Tuû verò præmiû potius quàm felici-  
tatem appellare cogor, in quo omnia ab atavis Li-  
thuanix Ducibus, omnia à IAGELLONE  
Tuo, poneque sequentibus Regibus, toto latè vi-  
senda Regno merita, iurè ac meritò quidem coro-  
namus. Obsedere nos vndique suis beneficijs Ma-  
iores Tui, quacunque pedem ponimus ea calca-  
mus, quocunque oculos conijcimus, in ea incurri-  
mus, quocunque animos memoriamque proten-  
dimus, ea & colligimus semper noua, & fruimur  
vt nouis, & pro ijs omnibus, cum referre gratiam  
Authoribus suis iam non possimus, Tibi vni, in  
quo omnes illi viuunt, quantum nostra humilitas  
potest, referimus. VLADISLAORVM, CA-  
SIMIRORVM, SIGISMVNDORVM,  
haud perfunctoriè memoranda Nomina, affluente  
rerum immensâ copia, diffusam propè in im-  
mensum Orationem desiderant; nisi cum Fastos  
impleuerint æternitatis, angustâ hâc paginâ, cala-  
moq; mortali circumscribi se succenserent. Lo-  
quuntur ipsa, Orbemq; ingenti famâ implent, The-  
utonica, Prussica, Gothica, Moschouitica, Scythi-  
ca, Othomanica trophæa: Loquuntur, quacun-  
q; intestus nobis Oriens ac Septentrio porrigi-



tur, & hostilibus armis vtrumque latus cingit,  
peragratae victorijs integræ Regionēs, redactæ  
in potestatem magnæ Prouinciæ, calcatae fera-  
les gentibus Lunæ, spretæ formidatae Orbi A-  
quilæ, territi & in speluncas suas claustraq; coacti  
Leones, quidquid solitudini, vastitati, niuibus, fri-  
goribus, feris, natura reliquit, compressum & no-  
cendo inutile factum; exinde longe lateq; promoti  
amplificatiq; Regni fines, amplissime diducta Po-  
loni nominis gloria & reuerentia: Omnia ipsorum  
quoq; Ciuium voto maiora, & veterum Impera-  
torum Ducumq; gesta & laudes supergressa. In-  
comparabilia hæc, & iam magnis Annalium mo-  
numentis, magnis ingenijs celebrata, latisq; nun-  
quam pro merito celebranda, leuissimè insinuauit;  
sed pauca ex multis, quia nostra tantum, Patriæq;  
isti, hoc est, vni in Orbe Populo, parata in æuum  
ab ipsis bona. Quid? si in omni memoria atq; Gen-  
te, extensam cum Sole Vestri Sanguinis hæredita-  
tem quæsiuero? si quidquid terrarum Auster Oc-  
cidensq; pandit? si tot remotas nationes, tot Re-  
gna, Principatus, Populos, omnes Vestra cogna-  
tione innexos, iustrauero? Fæcunda certè Impe-  
ratorum Regumq; Mater Austria, sine Vobis fæ-  
cunda esse non potuit; & quotquot hodie Augu-  
stos Heroasq; suos ab ERNESTO Archiduce nu-  
merat, non magis Austriaci illi à se, quàm Iagel-  
lonici Koributei uè à Vobis dici possunt. Ita ve-  
lociter armato Vestro Equite, Europam peruasi-  
stis vniuersam: ita Lunam Vestram & sydera, & ab  
ijs deriuatos Serenitatis radios, per sacratas Cæsa-  
rum Domos, per Germaniam, Hispaniam, Italiam,  
per Lotharingas, Mantuanas, Bauaricas, Palatinas,  
stirpes:



stirpes, abundantissimè diffudistis: ita summæ adoratæq; terris Prolapiæ, & quæ veterem Romanæ Maiestatis gloriam nomenq; sustentat adhuc, & quæ in Regnis suis Solem nunquam occidere gloriatur, & cui Christianus Orbis Terram olim debuit Palæstinam, & quæ sui Authores Generis Palæologos clamat; intra Vestram Domum censentur, Vobis, à sequiore sexu, splendores suos debent referuntq;. Quid amplius subesse cælo poterat? quid infra Lunæ orbem, ita Diuis proximū, religio cultusq; gentium facere? quo Imperatorius iste atq; Regius; iste verè triumphalis, nulliusq; suorum degeneri ignaviâ vnquam pollutus, tot Principum sanguis, iste bono mortalium datus non penetraret. Et tamen cum ita ad summum altitudinis fastigium venisset, inuenit adhuc incremento locum, nè fines eius angustiores viderentur esse quàm mundi, mundi quoq; terminos superauit. Petijt quippè cælum conscenditq; in Diuo Indigete suo CASIMIRO, dum castissimos innocentiae suæ flores, ipsaq; castitatis lilia, ex natali agro Iagellonico, eiusmodi germinum feraci educatore atq; altore, in cælestis horti solum transplantauit. Accendit nouas syderibus faces, misitq; domesticam cælis ad decus ornatumq; dignitatē, in ORDOWAZIO, STEMBERGIOQ; Diuis, quos vtriusq; communio sanguinis Koributeæ inserta propagini, Tibi REX vindicat, & ex asse Tuos facit. Ergo quos alij à longè, aris, puluinaribus, flamine, colimus; quorum nobis nulla mentio, nisi inter Numina fit; Tu domi Tuæ habes: Non ad exigui commendationem temporis, productas velut in scenam, personatasq;, & verè non aliud



quàm fumosas tantùm imagines: Non tanquam  
formatos à naturâ ad breue spectaculum, fluxos in  
aëre ignes, coronas, arcus, Solesque mox vt admi-  
rationem sui fecerint, interituros: Non fabularũ  
mendacijs subnixos, originemue suam Deucalio-  
nis sanguini inuoluentes, ab inundatione etiam,  
si dijs placet, seruatos Maiores; sed quos æternitas  
ipsa, iniuriosæ temporum vetustati subtraxit, fama  
rerum cælo terrâq; immortales fecit, humanâ ma-  
ior magnitudo, non hominum tantum, sed mino-  
rum quoque Heroum vulgo, exemit separauitq;.  
Vt dulce est talibus immorantem Ceris, mellea,  
quorum illi Parentes erant, delibare sæcula! mel-  
lea, quorum Tu Parens eris, augurari! neque id  
vane; illo ipso publicæ fælicitatis, Tuæq; primũ  
Maiestatis auspice signatoreq; die, ipsis apibus ad  
mellificium Tuorum temporũ certatim conuolan-  
tibus, illo campo, (nota loquor) augurij fidem e-  
xolvente. Vt iuuat! ex eiusmodi imaginibus, tot  
religionis, magnanimitatis, fortitudinis, Martiæ in-  
dolis roborisq;, suffecturos ad omne virtutis exẽ-  
plum colores, imò non iam virtutis exempla, sed  
ipsam, humanos indutam vultus, legere discereq;!  
Vt delectat! longius Illustrissimas vmbras, in-  
tentiusq; oratione prosequi! sæpius defigere aciem,  
mentem, stylum, alios ex alijs occurrentes, longâ  
& interruptâ serie, Viris Viros, Heroes Heroibus  
lectos succedentesq; mirari, signare, ostendere, di-  
utiùs in hisce Tuis penetralibus, in Capitolio tri-  
umphali, inter Palmas & Laurus commorari. Quid  
enim? cum proximè ad Visnouecios, Zbarasios,  
Poryccios, Voronecios, omnes Koributei nomi-  
nis inuictos Duces, quorum nunquam virtutis aut  
fortu-



fortunæ nos pænituit, ventum est? quid video?  
nisi ex veltigijs eorum nasci Laurus, ad fortunata  
prælia coniuratos venire Diuos, quot facta, tot mi-  
racula exhiberi. Quid? nisi Marti Bellonæq;  
habitos vultus, & nobilem iram, in solos DEI  
Patriæue hostes, spirantia ora; nisi secutam sem-  
per illorum arma, signaque militaria, victoriam, eâ  
fatilege, vt nunquam effugerit, & si maxime po-  
tuisset effugere, vt nunquam voluisset. Video  
contectos cædibus campos, Boristhenem & Ty-  
ram, Hipanim & Prutum, cruentatos, feroces Ge-  
tas, Daços, Bulgaros, vltra suam Bessarabiam Scy-  
thicasque solitudines, & totam immanem prope  
vastitatem circumiacentis soli, abactos profligatos-  
que. Audio desperationem, vltimosque pereun-  
tium barbarorum fremitus, inter cumulos corpo-  
rum armorumque, inter tabem sanguinis incondi-  
tas voces, admixtam his læto clamore alacritatem  
vincentium; cuncta, æque patria ac infesta, ingens  
**KORIBVTI** nomen, ingentem nominis glori-  
am resonantia. Qui illi, sanguine, fortitudine, iu-  
uentæ & animi vigore pares **VISNOVECII**! vnâ  
acie Tamerlanē, totis Asiæ virib<sup>9</sup> opibusq; subnixū  
sustinentes! quomodo immemores sui, memores  
gloriæ, inter implicata aut fluitantia signa, inter den-  
sos cōfertosque cuneos, deuotis corporibus prouo-  
lant! quomodo effluētibus lassitudine viribus, ma-  
iore gloriâ quam gaudio, victoriâ suo ipsi sanguine  
signant licitaturq; in omnibus Decijs pares, successu  
in publicum etiam maiores. Quis ille **ALE-**  
**XANDER**, Magno fortunâ non virtute minor?  
en ad Orinimum, ardenti equo ardentior ipse, hac  
illâc fulminis instar volitati Scythas transuersos



aut obuios, quacunque datur, proruit, fundit, dis-  
sijcit, atque vt solent fortissimi, cædendo fessus, ca-  
dere mauult quam cedere! Quem dicam? aut quæ  
cæli parte locabo DEMETRIVM, terris o-  
mnibus altiore? illum ex vno Constantino-  
poli pendentem: nec vsque ad mortem tantum,  
sed aliquod etiam in ipsâ morte prodigiosæ forti-  
tudinis experimentum, barbaris dantem! Desere-  
bat cum vita, non animus, non constantia, mori  
coactus vinci non potest, intentat adhuc minas in  
hostem & vulnera: postulato quippe arcu, tendit  
neruum, fortiter implet, destinat certam in pecto-  
re barbari Bassæ metam, oculo manuque adiectum  
consentiente, sagittam mittit, transfigit, conficit,  
sternit; alibi toties Turcarum, hîc semel naturæ  
ipsius triumphator, alibi hostes virtute, hîc omnes  
ante se Heroes exemplo vicit. Aliò me vocat,  
libentemque moratur, plenum numerosâ gloria &  
iucundo horrore spectaculum: Hi detonantem a-  
liquoties in nos, hostilium armorum tempestatem,  
in seipsos deriuant auertuntque, bellum publicum  
suum faciunt, quò studium eorum in Rempubli-  
cam, animusque excelsus clariùs existeret, priuato  
sumptu, promptâ de suo beneficentiâ, non legio-  
nes, centuriasue, sed integros exercitus hosti oppo-  
nunt: Illi in præmium mercedemque bonorum  
Reipublicæ, prout aliquis in pace aut bello enituit,  
amplas possessiones & patrimonia distribuunt:  
Alij triumphantium in morem Byzantium inue-  
cti, suspiciendum superbo Orientis Tyranno, Po-  
lonum nomen, pari splendore & animi magnitudi-  
ne ferunt, nullis ex publico adiuti opibus, nusquam  
gloriosiori impendio, Regiam magnificentiam,  
Re-



Regiam gazam ostentantes spargentesq; : quibus si tunc Regius honor defuit, certè non dignitas. Alij publicæ pacis suâ iacturâ Feciales, ipsa quæ eam morarentur, officerentq; bono Patriæ, oppida in planum agunt, non priuatas in Veliâ ædes, quod Romæ æternæ laudi Valerio habitum, sed magni sumptus magnorumq; redituum loca, sine supercilio, sine rugis demolientes. Omnes simul, confinijs barbarorum & indomitorum populorum cincti, velut fato ad eam gloriam reseruati, vt pro communibus aris focisq; soli excubarent, vt vigilantibus illis Antipatris, securè dormiret Patria, illiq; primi pericula nostra exciperent, nos periculis illorum tuti ac felices viueremus. Dico hæc, tenuis grandium laudator, non fucò ad placendum subornato, sed fide & conscientiâ generis humani, ex publico abundè suam accipientia memoriam & famam, nec tam mihi verendum est, REX, nè in laudibus Tuorum, nimius apud Te videar, quàm nè parcus & sterilis, cum nihil in alijs par simileuè, inueniam. Rideo enim, rideo, quanquam indignari æquius est, quoties multos, suæ tantum fortunæ mole insignes, prædicari audio legoq;, feroces, & discrimina lacessentes, cum utiq; illa absunt, victores populorum, quos nunquam vidissent, aut si aliquid antea præliorum, illud specillis tantum vidissent, spectassentq; velut è portu aliorum naufragia : quoties adultores, seruum pecus, inuidtos animos mollissimis hominibus dare, & militari fronde pacifica capita coronare. Hoc profectò plus est, quàm mendacio staturam adiuuare, & non laus ista, sed lusus, & ignauriæ exprobratio est. Cum  
VIS NOVE CIORVM gratam mentionem te-



stamur, cum ingentia ipsorum facta, ipsosq; posteritati commendatum imus; non est periculum, ut istiusmodi artis ludibria & Eloquentiæ dehonestamenta adhibeamus: Superant facta artem, longeq; scriptoris industria est ab Authoribus rerum, quidquid de illis dicendum habeas, ita dici debet, nè idem illud de alijs dici potuisse videatur; quia non à quoquam geri possunt, quæ illi præstiterunt. Præstitisse verò vnum quis credet? nisi VISNOVECIUM: vnum ingentium capacem historiarum, tantoq; maiorem omnibus, quanto cumulatiùs omnium vnus decora collegit in se, omnium vnus absoluit consummauitq;. Aude, calame! nominare Virum, per tot Imperatorum, Regum, Ducumq; velut detritos à virtute calles, eluctatus, nitere adhuc in altum, suspice, & imitare ardua aggressos, etiamsi decidunt, magna conantes. Iam mihi ipse de Throno annuere videris, REX, & submittere Fasces Regios isti Nomini, quod dudum dicere gestio, cuius immortalibus meritis Te Regem debemus, quod leui prædicatione, vel transilire vel præteruehi, cuiquam Polono, non turpe tantum, sed nefas etiam est. Hic, hic, INVICTISSIMVS Parens Tuus, HIEREMIAS est, cui, iamdudum radiatum caput, & media inter Reges sedes, auro stare aut ebore, augustiorique cultu, & grandioribus votis celebrari deberet; nisi Tu votis nostris occurrisses, in quo, ut Patrem agnoscimus, ita eundem à Te exigimus expectamusque. Quid simile, ludicra fabularum commenta, in vestro Hercule, Achille, Hectore, effingere potuistis! postquam vera Magni HIEREMIÆ virtus, & fabulosis nominibus

fidem



fidem fecit, & sæculum nostrum inuidentiâ prioris liberauit. Angusta & illa nomina sunt, Camilli, Scipionis, Marcelli: quos non quidem immeritò sed nimis, nec tam sine causâ, quàm sine modo sineque, antiquitati laudatos, nil moramur, quando tot gestorum miraculis, in vno illo, haud inferiores, verius iactare possumus, Visnouecias laudes nulli non magnitudini, nullis non exemplis pares esse. Adæquare illas dicendo nemo poterit, nisi qui sigillatim, & fidelissimè narrauerit; & narrare non poterit Historicus, quin ipsorum numerofo circuitu ambituque facinorum, ipsaq; cum amplitudine rerum, crescente vi ingenij, velit nolit, Orator fiat. Vetera non commemoro, id est prima **POLONI HERCVLIS HIEREMIÆ** Martialium operum rudimenta, non annis distinguenda, sed victorijs. Vt illo animi vigore! illo ætatis! ad tonitrua belli impavidus, vincendi indefessus, Magno Regi **V L A D I S L A O**, dignus vterque, & Imperatori Miles, & Militi Imperator; obtigisset. Horum quippe memoriam, ipsa felicitas non tam absoluit, quam distulit, & velut interiecta aduersorum nube abscondit. Sed postquam **Regum Maximus, Cælo additus, atque V L A D I S L A V I A N A** iâ tēpora, cū Sole suo occiderāt, (magnitudo cladum facit vt meminerimus) postquam, post victorias, species victi Regni, & tot casuum, funestarumque tempestatum myriades, superuenere, & cum his, maximum liberrimæ Gentis dedecus, bella seruorum: Quis Horatius Cocles, rebellem illam colluuiem, totamque sedibus suis excitam in nos Tauricam, sustinuit? & ne viscera corque Regni peteret, solo pectoris sui op-

E positu



positu stitit à curritque? Quis Scipio, felix vbique  
& victor semper, vefanos lymphatico furore. hostes  
repressit? magnâ suâ & fatali rebellibus fortunâ,  
& semper in malis maiore. Quis tunc Camillus,  
seruata decus Patriæ, præ illo tulit? Parenſque  
ac conditor alter Imperij, non militaribus tantum,  
quos inconditos iaciunt, iocis, nec vanis vulgi lau-  
dibus, sed plenâ, per Orbem personanteque famâ,  
supremi vsque in terris Oraculi voce appellatus? Bo-  
ni superi! cur aut cælestē Viro animū, aut mortale  
pus dedistis? aut cur humanæ laudis limites exceſ-  
ſiſſe, non impunè fuit? Merebaris, Magne HIE-  
REMIA! implere ætatem tot annis, quot im-  
pleuisti meritis, tot præmiorum cumulis, quot cu-  
mulasti labores; vel saltim hâc, quam fruendam  
nobis ex Te felicitatem reliquisti, ipse simul no-  
biscum, sed excellentius, quia intimius, & magis  
legitimo iure, quia paterno, frui: videreque tot  
Ciuiças, Obsidionales, Castrenſes Coronas Tuas  
in vnico Serenissimi Filij Regio diademate, ma-  
gis conspicuas, relucenſesque. Merebaris ista, ma-  
gnisq; decurrebas passibus, quacunque se ampli-  
or virtuti & gloriæ porrigebat Orbis; cū natura,  
quò Herculem ex pleno abundantique faceret, non  
solum Tuos quoque habere Te voluit Euristheos,  
sed iam currere plus vltra prohibuit, & posuit me-  
tas. Tibi, Tibi, Serenissime MICHAEL!  
plus vltra datum est, maiorque imposita necessitas  
diligentiæ, imitandi priorem, qui sequeris, vt pul-  
cherrimam Patriæ virtutis hæreditatem augeas,  
donec superes etiâ vincasque: vt quandoquidem  
à DEO datus es, vnâ itemque certissimam Di-  
uinitatis fidem, Parenti etiam Tuo asseras, Te ipso-  
Opti.



Optimo, Maximo successore. Nunc illum sydera pererrantem, immixtum Iagellonibus Kori-  
butisq; suis, quanto gaudio frui existimas! Cum  
videt Te, non tam ex se viventem, vti exemplo  
Maiorum, æmulari virtutes, ad commemoratio-  
nem earum excitari, ex magnitudine earum spiri-  
tum ducere; quàm ex nobis regnantem, scepro  
iam atque Coronâ, quàm antea ferro galeaque po-  
tentius ornatum, non nudâ Maiestate, sed iam o-  
ptimis moribus, populo ius dicere, iam res gerere,  
iam noua & meliora Patriæ fata moliri. Quam  
lætum illi? quod comparatus Tibi vincitur, agno-  
scitque, ab ijs, quos toties manu suâ seruauerat,  
plus iam sibi pro Te Solo deberi. Agnosce & Tu,  
ô REX, quantum Tuo isti Miltiadi, eiusq; tro-  
phæis, quàm ingentem gloriæ ardorem sitimque  
debeas! non aliâs illustrius abundantiusque ex-  
plendam, quàm dum magno ab eo accepto gene-  
re, maius ipse inchoas facisque, ad cum exercendæ  
explicandæque virtutis locum prouectus, in quo  
omnia Tua, minima, maxima, omnium erunt, nec  
magis ad Te, quàm ad Rempublicam pertinebunt.  
Nam profectò, qui in excelso, adeoq; in Solio æ-  
tatem degunt, eorum Fortunæ Maiestas, velut in  
Sole, nihil obscurum arcanum uè esse apud homi-  
nes finit. Alia specioso licet obtentu velata, facta  
ipsa arguunt produntq; in multis, indiscreta Ma-  
gnorum pedissequa, haud semper errat Fama; quæ  
quæ hoc quoq; nomine, meritò malum audit  
quod in aduersum gliscat, contraq; nitatur: quan-  
tò intentior vigilantia, tantò illa irritari magis,  
& interdum falsis accedere incrementum & fides.  
Ideo etiam de longissimi temporis spatijs, æuique



post se magnitudine assequendâ, nullorum magis,  
quàm Principum vsibus accommodatior cogi-  
tatio est: quorum sæpe oculi voluptate & tor-  
pore languidi, atque assentationum nubilo hebe-  
tati, quanquam in multâ luce & splendore, adeò  
tamen conspectum non præstant, vt nec præsen-  
tium hominum de se iudicium vereantur, nec ven-  
turatorum futuram famam & existimationem. Qui  
si se omnibus horis esse in amplissimo Theatro, in  
luce tot tantarûque Gentiû, in auribus tot finiti-  
morum populorum, pluribus ad exemplum quàm  
imperium positos, quoquo versum longissimè la-  
tissimèq; conspicuos, aduerterent reputarentque  
sæpius ex vultu & eo quod adest, ad occiput atque  
id quod instat futurique æui memoriam, oculis  
translatis, ne quem habitum absurdum, motum  
inconcinnum, flexum indecorum, posteris relin-  
querent, anxîâ & peruigili cautione obseruarent  
præuiderentque. Scilicet, vtcunque se præclare  
gesserint, hoc illicium esse, quo in præmium rapi-  
antur, aut si quâ in re, trans recti decoriq; lineam  
iuerint, hoc Tribunal, cui reddant rationem. Quan-  
quam me ista aud Te differentem, subit cogitatio,  
nullam Gloriæ, & illustrium exemplorum, & pu-  
blicæ Famæ lucem, parem cogitari posse illi, quâ  
Tu domesticâ habuisti, quam simul cum vitali hâc  
aspexisti, quam inter vagitus & ante literas par-  
uulus didicisti; ideoq; illam ita oculos Tuos, au-  
gusti; pectoris sedem, iam inde à cunis incoluisse,  
vt nihil quod atrum clausumue sit, nihil quod à  
publico separatum, facere possis ac sentire. For-  
mauere animum hunc, Regiæ Fortunæ ab alto de-  
signatum, illa inter tympana ac tubas nutrita vi,  
illud



illud venerationis, cultus, comitatusq;, amplissimum tunc quasi quoddam & Tuum Regnum, illa Paternæ Maternæque aulæ disciplina, digna Polonæ iuuentutis, & fortium Virorum Militiæque Illustrium Palæstra; illinc VISNOVECIO-  
RVM, hinc ZAMOSCIORVM triumphalia ornamenta, paribus vtrinque illigata nexibus: Non Græcis, non Romanis opus Tibi erat exemplis, cum paria domestici Lares, illustrius darent. Igitur quemadmodum Herculi contigit, à Matris vtero fortem esse, & vincere; ita nos Tibi vero Alcidarum Sanguini, optabamus cunas viriles: Cum Tu ex angustijs & umbrâ illarum elapsus, antevertisti etiam vota nostra, iam tunc internuces & crepundia, nihil potius quam excidia urbium, commissas acies & perruptas, sonantia arma virosque, ac Triumphos Tuorum audire; ad ea attolli, assurgere, & animo commoueri, solitus esses; ut solent ad indomabilis matris aspectum, catuli Leonum. Hi in Te emicabant venturæ Serenitatis radij, ex his nos, certius magnitudinis Tuæ Augurium, perrebamus promebamusque, quam priscorum afferebat extispicium, quam præpes ales, quam solistima tripudia, quam aliquod horoscopon, & ludicra vel cæli mendacia, vel illorum, quibus longius ac latius per cælestia expatiantibus, non semel contingit, toto prorsus cælo aberrare. Ferenda demum erant & innoxio capite luenda Polona fata: Tulisti ijs temporibus, quibus præmaturas Reipublicæ inferias, ac non mortis tantum carmen canebamus; Cum seruili scelere auitis euolutus bonis, amplissimi patrimonij ingentiumq; opum modò Dominus, non alias tandem certior



res suscepisti, quàm solùm, quæ Patrem dignum  
maximis fecerunt, merita & virtutem. Serua-  
baris per ea pericula, fermè miraculo; nec opus  
erat renouari in Te exempla Iosue, inhiberique  
cursu suo Solem & sydera, cùm oculi DEI, quo-  
rum Sol & sydera vmbra sunt, starent semper fixi  
supra Te, intentique arcano suo, humanis maiora  
consilijs ac destinatis, de Te agitent. Ne ma-  
gnarum rerum oneri succumberes, maluit Te For-  
tuna in castris suis habere, quàm delicijs: nunquam  
molli virtutis documento. Verum robur Te col-  
ligere, & obsequio ad Imperium, per vsum aduer-  
forum ad secunda, venire voluit; vt dignus cape-  
res quæ Tibi munera, quas trabeas parturit. Non  
fuit hæc illius sæuitia, sed certamen; imò experi-  
mentum, vt certa esset, quàm benè humeris Tuis  
federet Imperium, quàm scitè sceptræ fascesque  
manibus tractares, quàm firmiter valenterque Co-  
ronam capite sustineres. Sed & felix, nec suo o-  
mine vacuum fuit, hoc experimentum. Quidni  
enim iure dicere possum? Pro eo quod à Fortu-  
nâ visus fuisti derelictus, qui ponendus eras in su-  
perbiam nostri sæculi, gaudium vniuersæ plebis,  
verè mamillâ Regum lactatus es, & erant Reges  
nutritij Tui, & Regina nutrices Tuæ. Simulac  
enim Diuus Parens Tuus his terris excessit, resque  
mortales destituit; habuisti, quem Parentis Tibi  
loco DEVS mandauerat, cui cultam eruditamque  
iuuentam in acceptis ferres, apud quem Regias do-  
tes, Regium spiritum geniumque indueres, Sere-  
nissimum PRINCIPEM CAROLVM, iam tum  
gaudia amoresque nostros in Te prælibantem.  
Habuisti demum Sarmaticam Semiramidem, LV,  
DO.



DOVICAM REGINAM, supra sexum, etiamque viros, animorum perspicacem, cuius inuidiosis laudibus, hic quoque cumulus accedat necesse est, quod cum maxima quæque scire desiderasset, non ignorauit rem præclarissimam, Meritum Tuū. Dicamne hic? sub tantorum Nominum oculis atque magisterio, quibus studijs exegisti adolescentiam, priusquam illibatam animi pacem grauiores curæ deterfissent: Vt in Te ipsum statim egisti Principem, qui in alios acturus eras Parentem, vt Te in potestate habuisti, consulere assuetus rationem, priusquam aliquid velle ausis aut nolle, vt semper pollicitus es maiora, cum maxima exhiberes. Nunquam de vitijs molliter sensisti, nunquam contumaciam in peruersa nitentem, aut leuitatem semper alio transilientem, aut temeritatem præcipitem, aut torporem, cæteraque mentium mala, amplexus, non superbia inflatus, non cupiditatibus distentus, non voluptatum ignobilitate priuatam sortem imitatus. Inde regnandi artem, præceptorum plenissimam, & ex cuius erratis omnium perniciēs pendet, vtiliter probeque didicisti, dum à Te ipso inchoasti: nec dubita, populorum quoque fortunam, Futuram artem Tuam, si exemplum Tuum impavidus sequaris, nec à Te, quem omnes suspiciunt, vnquam discedas. Pudeat illos, omnium iam sæculorum infamiā damnatos, qui flentibus populis læti, & ruinā Ciuium feliciores, quàm hostium, Principes cum maximè videri volebant, minime erant, erant autem, Satyrā quàm Panegyri digniores. Qui vilem spernendamque suam potentiam rati, nisi, quos illustrabat, vreret, etiam consumeretque; cum se totos per-



misere Fortunæ, primum sui, deinde omnium ob-  
bliti, postremò etiam naturam dedocti, in eos tan-  
dem errorum scopulos impegere, quos veloci pe-  
de confecta Patriæ suæ vastitas, & nonnisi probro-  
sa peccantibus, illisq; , qui periere, prorsus inutilis  
pænitentia; aut sæpe & ipsius pænitentia verecun-  
dia. Tu, REX, ita ab ineunte ætate institutus  
doctusq; es, vt semper alium Te esse sentiremus,  
non quem Fortuna ostendit: inter blandimenta  
eius innoxium, & nusquam conuiuentem, inter tot  
Maiorum fastos nullo fastu, inter vaserrima inge-  
nia & plerumq; timenda intaminatum, secu-  
rum inter togatorum latrocinia, tempestates, nau-  
fragia; Syrenes etiam, quæ faciliores quosq; alli-  
ciunt, & nonnisi perire volentibus placent. Ma-  
gnus hoc, priuatim, vel in priuato, vel qui ad non  
suæ spei & claritudinis Nomen dignitatemq; ela-  
tus, maioribus fatiis quàm ex Parentibus nascendo,  
compareat. At, Tibi, qui vix natus, habuisti in-  
ter homines causam celebritatis & Nominis, at in-  
patienti omnium ore luceq; Fori, at in magnâ  
Aulâ, virtutem nec allidere nec abscondere,  
tantò gloriosius, quantò in alijs opinione a-  
sperius, & arduum factu est, & nonnisi Tuum fuit,  
Tuiq; similitum. Inuenisti eò loci semper amorem,  
vbi satis abundeque est, vitare odium, vbi sine di-  
scrimine felicem esse non licet, vbi vsque adeò o-  
mnia odijs patent, vt ipsa nuda veritas, licet for-  
mosissimam dicant, amatores tamen plerumque  
non inueniat. Quid? si, quod omnium liberri-  
mum est, amare & odisse iubeare, & aduersas res  
adumbrata lætitia abscondere, & dissimiles animo  
vultus, pro re ac loco sumere ponereque, & nus-  
quam



quam vnum hominem agere. Quid? vbi in tanto falforum fallentiumq; populo, nemo est, qui non verendus suspectandusq; iure sit. Alius, quem declinasse vellem, inuito occurrit; alius intempestiuo officio, longis & inanibus fabulis aures obtundens, dum se mereri putat, lædit; alius, dum humilitatem suam, maioribus vult nobilitare nominibus, fastidientem & refugientem ambit, salutat, deducit, quem nec rectè admittas, nec honestè fugias. Iam illa callida & subdola ingenia, quæ ingentis amicitiae speciem, & vetera nomina, imposturis suis obtundunt, intereâ pestiferâ comitate, quidquid intus est, pertentant, explorant, verba, verborûq; circuitus malignè detorquent, qui fædâ simulatione sui, familiarissimam cuiq; bono virtutem excutiunt, simplicitatem. Adeò verissimum est, plagam hanc, ventorum Regionem esse, plenam scopulis, Syrtibus, immanibus cetis, quibus esca piscium vulgus, sed maximè animalibus plenam amphibijs. Quisquamne hic fuit, ita satis prudens cautusq;? quin offenderit? quin cespitauerit? Quisquamne innocentiam, & custoditum integrè decus extulerit? Fuisse Te spectauimus, REX, & ex sterilibus auenis virentia culta messuisse collegisseq;, è venenis tulisse antidota, è tot nocentium prauorumq; conspectu, multa bona ad vsum Tuum, multa ad bonum nostrum, in arcanum pectoris, nunc euoluendum, seposuisse. Fecisti in hoc versatili omnis prudentiæ Theatro, difficilem scenam, Te Actore, omnium plausu, omnium amoribus dignam; Scyllam hanc præternauigasti, nec abreptus es; Circes poculum bibisti, nec mutatus; per subiectos dolofo cineri ignes incessisti, nec ambustus es. Adeò



cum laudanda cuncta faceres, nil erat ex his, quod amici Tui excusandum haberent, nil inimici infestandum, nihil Tu ipse pœnitendum. Secutus enim es præsentem Tibi semper Deum, rigidus in omnibus honesti exactor, nulli humanæ necessitudini legiuè, ante Æternam, nulli commodo bonoq; ante Summum, addictus, & famam multum, at maxime conscientiam reueritus. Odisti naturâ inimicas virtutibus artes, & doctrinam Deos spernentem, & illam pietatem, fortunæ pro tempore & loco obsecundantem; quæ amat speciosâ sui incrustatione Orbem ludere, eorum, quæ alias non necessitate, sed recte faciendi consuetudine, perinde ut vetita feruantur, plerisq; gratiam facere, fraudem simili affiniq; virtutis lenocinio ac colore oblinere, integumento candoris ac sinceritatis obuoluere; vno digito cælum diuinâq; monstrare, atq; totis manibus terram ambire, premere, aggerere, & inter homines, nil magis quàm humana miscere agitareq; Nam hoc etiam apud Te, REX, qui pietatem mente purâ, animo innocenti, vitâ probâ profitearis, dicere liceat; in hac quoque Cedro suos latere vermiculos, & infelicitis sæculi genio (quod non nemo dixit) nullâ viâ magis, quàm publicâ, religiosâ & sacrâ, errores & fecus admissa irrepere: inde alia alijs nequiora, velut serie iuncta copulataque venire solere, ambitionem, petulantiam, antiqui moris contemptum, Diuûm negligentiam, timoris pietatisque obliuionem, iniurias in gloriam, atq; ius etiam honestumque translatas, & cupiditates eiusmodi, quas rectus & similis Tui iudex, nunquam absoluerit. His Tu pridem intactus, & aduersum munitus es, sponte naturæ, & ingenio,  
quale



quale Gentium votis decet esse propitium, fraudibus imperuio, aperto virtutibus, solis vitijs clauso. Ideò non feres fucum vllum in purpurâ; colorem respues in animo, cælo cum sudum est, simillimo; in tantâ luce tenebras ad suam regionem latibula: que damnabis. Hoc fulcrum erit magnitudinis Tuæ, hoc Te veneratione implebit apud Orbem, hoc tutum sanctumque præstabit; dum in fastigio positus, non magis magnus, quàm probus audire, desiderabis; dum potentiam iustitiâ moderaberis: terrorem in hostes, amorem in Ciues exercebis; dum Solis instar, æquali semper splendore placidoque conspicuus, fortunis humilioribus paruisque ignibus, permittes tranquillè ducere suam noctem. Vnum Te Deus donauit omnibus, vni Tibi omnes, si benè vti viribus istis amas, ne quidquam ad Diuinam propius naturam accedere puta, quàm vt vnus omnibus prosis. Ecce vix bellis, quàm sæuâ pace miserior oppressa plebs, vix iam quid amittat habet: ecce Parentem Te Patriæ inclamat, sis quod vocaris, & serua Serenissimum titulum: quem vtut alijs assentandi necessitas, aut publica emendi talia vendendiq; consuetudo, affingere soleat, sola tamen discernit, & verum mansurumq; facit, non nisi conscientia populorum, æternitas temporum, Fama rerum factorumq;. Fædè inflatur caput, si vt pinguedinem suam augeat, reliquum corpus languet, membraq; squallore, macie, neglectu, deficiunt: nec minus miserè regnatur in vacuos Ciues, vbi egeni, inopiæ suæ pænas, apud Principem luunt, nouisq; sæuitiæ artibus, macilenti, exsucco, & exangues, sanguinem largius effundere iubentur. Quanto melius pulchriusq;, Superum



more, calamitosos propitium respicere, securitatē,  
beatam, altam, affluentem, donare, ius supra omnē  
iniuriam positum dispensare, utq; Pius, Augustus,  
Felix, ex merito dicaris, felicibus imperare. Ha-  
bemus bonorum istorum, certam non iam tantum  
spem, sed spei fiduciam ex Te, qui eundem Geni-  
um Deosq; eosdem, in consilio iam habes, ad regen-  
dam Rempublicam, quos ad capeſſendam, habui-  
ſti: talemq; Te Ciuibus Tuis Regem, præſtare  
incipis & laboras, qualem Cuius optaſti, non malis  
melioſem, ſed optimis parem. Habes & Tu ex  
nobis, paratam felicitati Tuæ, materiam & instru-  
mentum, quando in omnium ore, oculis, animo,  
ſedentem lætitiā, & conſentientes cum animis  
gratulantium, vultus, & effuſas ad nutum Tu-  
um voluntates legis, & gaudens ipſe uſurpas.  
Sicut enim his tot millibus mortalium, non fuit  
ille ſine ratione conſenſus, dicendi Te ſalutandi-  
que Regem, & ſe ſuaque ante Tuos iactandi Fa-  
ſces; ita nunc vnum omnium certamen eſt, vna  
contentio. quis prioribus officijs, ſuam impe-  
ranti approbet fidem, quis reuerentius ſubditum  
agat, quis libentius iuſſa excipiat; quia nihil iu-  
bes, quod publicè non ſit ſalutare. Credunt  
plerique, prout in Libertate nunquam deeſt, quod  
accuſetur, & haud ſemel conſtat, aſpernatos popu-  
los, quæ iubebantur, nuſquam arctius Reges, quā  
in Polonia agere, & ingentia quæque cæpia atq;  
optima moliendi, in publico, rationē in arduo ſem-  
per; Ex quo Libertas, cui ſapientia, æquitas, mo-  
deratio, omneſque aliæ bonæ Maiorum artes in-  
nitebantur, nunc cæteris anteferri, atq; inter pri-  
ma haberi cæpit. Inde nihil illā ad conſentien-  
dum



dum difficilius esse, nihil consultorum consiliorum-  
uè vigori magis aduersum, quemq; , ne alienæ sen-  
tentiae indigens videatur, ad sua tendere, quam ma-  
ximè in Republicâ velle valere, iussa ab alio veta-  
re, vetita iubere, prorsus homines inter se commit-  
ti, impare prudentiâ, pari omnium iure, nihil tam  
varium & inæquale, quam ipsam Ciuium æquali-  
tatem. Obganniant hæc, nigræ aliàs mentes, quæ  
interdiu hebetiores, obscuro tantum nubiloque  
cernunt clariùs. Atqui perspicacius attentiusque  
rem considerando, contra reperias: fabrum esse  
quemque suæ in Throno Maiestatis, & promptio-  
ris subditorum, obsequij: tunc si cui vigor & in-  
dustria, & solers Liberis regnandi Populis scientia  
adfuit, ei cuncta in Regno obediuisse, & nus-  
quam tædium Libertatis Sceptrorum uè contigisse.  
Ad hæc, ingenium cuiusque noscere, illi in procli-  
ui esse; virtutes, vt facillime gignantur, facere,  
optimè æstimando; nec alium deinde, aut pluris  
emere, aut minus extollere, quam qui talia maximè  
meruit. Sed inter hæc omnia, fortissimū ipsi, in id  
quod velit, adiumentū, præstoque esse, & maximā,  
quasi vnus imperitet, potentiam ac munimentum,  
compendio parari posse, id est amore in istā Patriā,  
bonam Matrem, amore in Ciues; Qui profecto  
postquam aduertere probauereque, larem illius,  
affectum populorum esse, Aulam, ipsam Rempubli-  
cam, Palatium non aliud, extra vniuersam Poloni-  
am: incredibile dictu esse, quantum licet in dissen-  
su, Maiestati fidi & obsequentes, priuatis eam ca-  
caritatibus teneriùs ament tueanturque. Et pro-  
fecto talibus Principum nostrorum animis, quam-  
diu durauère, inuicti florentesq; fuim', nūquā pace,

H

nunquam



nunquam bello etiam, motisque cum Deo, pro solâ Patriâ armis, laborauimus. Omnia prona victoribus; nisi cum aliorum, magni sed inutiles spiritus, versi directique sunt, tam demum propriâ experientiâ (vah! quam misera veritatis schola) didicimus; toties Deum non militasse nobis, quoties nec Deo militauimus, nec Patriæ. Sed cæ res longius me traherent diuerterentque: nunc ad Te, Regum Optime, redeundum est, inter Liberos natum, atque sic Genti omnino Liberæ, imperare abundè scientem, facileque verum futurum Patrem Patriæ; quia verus antè Filius exstitisti. Vt nemo detrectet imperium, benè illud firmasti, omnium mentibus illigatus & immixtus: ut nemo imbecillum atque caducum credat, solidas & manfuras sedes, & ea munimenta occupasti, quibus, non arces Carthaginis, non Capitolij insanas substructiones, & cælo certantia culmina contuleris. Habeant res suas sibi, qui regnare gaudent, execrantibus cunctis, atque vota, alia publicè, alia priuatim nuncupantibus; qui simulac noxium caput infauftamque frontem ostentarunt, fœuitiam ac terrorem loquuntur, ideoque publici odij scopus & argumentum, custodiam suam ipsi pauent: emptos Historicos superat eorum numerus, qui odere, exterè pariter ac sui, diris deuouent, plebs aliena est, etiam cadauera eorum inuisa. Iam Te nos, REX, à fronte, à tergo, à lateribus, obuium præcurrimus, sequimur, comitamur; non timoris obsequijs, sed votis pietatis; non ad custodis formulam præscriptis verbis, sed liberrimo sinceroque cultu; non necessitate & coactu, sed bonitatis ac moderationis Tuæ, Regiarumque virtutum, reuerentiâ & amore. Non iam  
Te



Te, sed pro Te metuimus, cuius quàm maximè interest, de sua fortunâ neminem queri : in cuius manu positum est, pluresne sæculum Tuum ferat Catones, an Clodios, Tullios an Vatinios. Nul- li malo, Te REGE, licebit esse felicem, nulli bo- no, continget esse miserum; sua cuiq; constabit, non ex solâ conscientiâ, merces; nec malus pro bono, Tibi subrepet, nec bonus pro malo displicebit. Nâ sæpissimè profecto accidit, vt humilē animorū fœcē illustri fucus obtegat, oculisq; mortaliū imponat : non aliter, quàm stellarū speciem mentiuntur fatui ignes, & sub candidis Olor plumis atram carnem fæ- tentemque abscondit, nec ipsis anguibus, pul- cherrimum veneni tegmen, versicolore tergo, & squammis fulgentibus deest. Hinc toties fucis parari pastum quem ignavi consumant, apes au- tem in ipsis operibus natas, nè quidē parto per la- borē melle, quietē securēque vesci posse. Hinc illud informe chaos, in quo summis ima confunduntur; quin etiam, hæc in altum indignissimè feruntur, illa pedibus calcantur : quasi inde Magnarum Po- testatum fastigia Cælo æquentur, quod in illis quoque Venus Stellam habeat, Minerua non ha- beat, & supra omnium capita, splendeant Scorpio- nes, Corui, Vrsæ, Hydræ, dignæ, non purissimâ Syderum luce ad memoriam, sed tenebris, ad per- petuam rei obliuionem. Sed Tibi, R E X, sum- mum rerum iudicium, & mentem Diuini huma- nique iuris intelligentem, satis maturè & prope ab ætatis exordio, velut generosioris arboris plantæ, quæ statim cum fructu est, Superi dedere. Nunc istas dotes amplissime exercebis; cum æquus o- mnium Iudex & cognitor, quantus quisque sit, ve-



râ æstimatione trutinaque perpendes, & nunc de-  
mum, ex vero meritoq; appellabere MICHAEL;  
non magis Gladio decorus, quàm Libra armatus,  
Quid iam aliud, optimis hisce sanctissimisque mo-  
ribus, nisi par temporum placiditas debetur? Malu-  
mus quippe, Te felici frui, quàm vti strenuo, &  
quanquam vtraque Tibi, Togæ & Sagi decora, il-  
lustribus experimentis probata, ex æquo suppetunt;  
prudentiam tamen, animi magnitudinem, æqui-  
tatem, clementiam, moderationem Tuam, pro-  
speris in rebus, continenter amare; fortitudinem  
in dubijs, nunquam mirari. Hoc vnicum, dum  
pro Te, & pro ipsis, quæ succcessere, votis, vota  
facimus, hoc (inquam) vnicum, maxime Superos  
& calidissime precamur, non vt eiusmodi impe-  
rium habeas, quo pluribus vrbibus, quàm homini-  
bus imperes; non vt vincendo solitudinem facias;  
non vt inter triumphos Tuos, euersam Patriam,  
prostrataque Magnas virtutes, numerare cogaris;  
sed vt dulces pacis delicias, & mel, quod Regio  
Nomine concludis, vbique, & in omnes diffun-  
das: in tantum viribus valeas, & nemo ausit; in tan-  
tum gratiâ, vt nemo velit, hostem se profiteri: Vt  
quemadmodum Electorali nuper campo, dum Im-  
perij Polonici pomum, prope euaserat discordia-  
rum malum, vna illa dies, vnus DEVS, vnus MI-  
CHAEL, suauissime partium studia composuisti;  
ita deinceps; armorum strepitus in amoris officia  
vertantur, Regnumque Tuum, fiat exemplo, quale  
Platoni fuit in voto, beatum. Accipe omen, ô  
bone REX! & hæc Tua Gentilitia Luna, quæ &  
ipsa in Arcum flectitur, velut Iris è Cælo, nuntia  
fæderis, & publicæ rerum pacis, imperet tranquil-  
lita-



litatem. Ita Te Regum Regnorumque Sator,  
DEVS, diu terris commodet, diu nobis conser-  
uet, seròque absoluat, grande hoc suæ Potentiæ  
ac Bonitatis miraculum: decet quippe munera sua,  
non magis magnitudo, quàm perpetuitas. Acta  
Tu KORIBV THEÆ Gentis, GEDIMINI  
Aui, OLGERDI Parentis, IAGELLONIS  
Fratris, & annos vincas, atque adeò, REX, in æter-  
num viue, Ringantur licet, & hæc memoranti  
obluctentur, quorum liuor & malignitas, nouissimè  
in furorem versa sunt; Nobis certe semper fastus  
solennisque hic dies erit, qui Te Polono inaugu-  
rat Imperio. Nemo nobis Publicam inhibebit  
Læticiam; nemo linguis calamisque de Te loquen-  
tibus, silentium imperabit: Æternus Te Anna-  
lium honos sequetur, & non Nostra hæc, quæ vt-  
cunque ex vmbra & puluere scholastico, trepide  
ac titubanter in lucem Tuam damus, quibus tamen  
plus fidei inesse, quàm dignitatis, ingenuè fatemur:  
sed seria scripta, & cælestium ingeniorum  
Diuina monumenta, pleniore stylo lau-  
deq; colent, semperq; celebrabunt  
Augustam Regni Nostri,  
Te R E G E,  
felicitatem,

*Winkler*








2. x. x. 2h.



Biblioteka Jagiellońska



stdr0016919



